

乾隆四明圖經

四明圖經卷三

宋元四明
六志弟三

宋

張

津

等

撰

奉化縣

望奉化縣本會稽郡鄞縣之地西漢志謂鄞有鎮亭結
埼亭皆在焉今縣東五十里有鄞城蓋古鄞縣之治所
也唐開元二十六年始以越州鄞縣爲明州析鄞縣之
地置奉化縣正元間爲上縣爲鄉一十有九皇朝景德
三年始併爲八鄉九域志爲望縣

賢宰

唐趙察爲縣令元和十二年鑿縣北河邑人德之因名

趙河元和十四年開白杜河凡溉民田一千二百餘頃

人物

孫郃有文名四明才名記云孫郃博學高才唐末授拾遺淨慧院卽其故宅

樓郁字子文志操高厲尙友古人經明博學其爲詞章務極於理教授鄉里人咸以先生稱之

按曰此數卷脫略甚然自明以來傳寫但只此本則久非全書矣今所校補具詳佚文卷中

四明圖經卷三終

鄞 徐時棟校刊

四明圖經卷四

宋元四明
六志弟四

宋

張

津

等

撰

定海縣

上定海縣蓋海埔之地本會稽郡鄞縣之靜海鎮晉安
帝時孫恩寇上虞劉裕出戍句章賊退還淡口卽此地
也梁開平三年錢氏據吳越以其地有魚鹽之利始開
邑曰望海旋改曰定海皇朝因之熙寧十年割鄞縣之
海晏靈巖太丘三鄉隸本縣元豐元年復割本縣金塘
鄉屬昌國其地三方距海中央微隆四面斜落如伏龜
之形九域志爲上縣

四明圖經卷四

鄞 徐時棟校刊

四明圖經卷五

宋元四明
六志第五

宋

張

津

等

撰

慈溪縣

上慈溪縣本會稽之地唐開元二十六年置州於鄞乃析其地爲三縣慈溪居其一焉然縣曰慈溪者因邑人董黯孝養其母而得名按唐崔殷作董孝子廟記云黯後漢人孝行著於鄉邑和帝召拜郎中不起厥後世爲名族故以董孝名鄉慈溪署縣唐正元中爲上縣二十
一鄉

賢宰

唐房瑄爲令流民來歸狡吏引去至今俗傳爲美談事
見祠廟門

張穎皇朝端拱初爲令以廉著名邑人號爲張清清餘
詳祠廟門

沈時升湖州人皇朝建炎中爲令誠心撫字愛民如子
俗咸化之旣去父老請於官建立祠宇於縣治號沈
公堂

人物

任光會稽典錄云光字景昇鄞縣人爲主簿時海賊作
孽縣令朱嘉將吏出戰於海渚嘉爲賊所射傷賊突

嘉前光往以身障蔽嘉遂獲免光力戰死嘉還邑出
俸厚葬之

後漢張齊芳驃騎將軍意之子隱於州之驃騎山

鄭雲會稽典錄云會稽句章人也與梁宏皆爲主簿俱
敦終始之義州里稱之一云雲字仲興學韓詩公羊
春秋爲主簿後以劉雋事獄死郡以狀聞旌表門閭
王修會稽典錄云修句章人爲揚州從事委身授命垂
聲來世

唐張無擇父死葬虎胛山廬於墓側感芝草生湧泉出
晉虞喜隱於大隱山三詔不起著志林行於世

舒亶字信道縣人也生而雋異魁梧特達垂髫時爲四
皓頌言偉志大老師宿儒知其有遠識博學強記爲
文不立藁尤長於聲律程文太學詞翰秀發爲天下
第一有舜琴歌南風賦膾炙人口流輩服之登治平
二年進士第授台州臨海縣尉縣負山海其民慄
悍盜奪成俗有使酒逐其叔之妻至亶前者命執之
不服卽斬其首以令投檄而去亶有詩題尉廳壁云
一鋒不斷姦兇首千古焉知將相才丞相王安石聞
而異之召除審官西院主簿充熙河路分畫蕃漢疆
界時洮隴新蹀血帥臣王韶欲以重兵防護亶一切

卻去獨以單騎徑往宣示朝廷威信夷人以刃割肉
試其誠否亶受之無難色於是歡呼畏服乃定其界
而還授太子中允御史裏行累遷試給事中直學士
院制命辭令簡重渾厚有兩漢風衆論稱之擢御史
中丞被詔舉任御史者十人所舉皆稱職時以爲知
人崇宣元年荆南辰州蠻獠反除直龍圖閣知荆南
府亶被命討蕩督勵士卒兵未壓境而羣蠻屈膝請
命朝廷遣使撫問加待制職亶時計議進築移屯沅
之洪江俄得疾是夕有大星隕於洪江之西遂卒於
軍徽宗皇帝悼惜其才贈龍圖閣學士澤及其子孫

有手編元豐聖訓三卷并文集百卷藏於家

逸民

方適先生按墓碑云慈溪縣人也字韓道隱居大隱山年七十餘以行義聞於鄉里人皆不敢道其姓名以先生目之其使人信重如此仁宗皇帝訪天下遺逸知州事鮑軻以適名聞旋賜粟帛至嘉祐六年知州事錢公輔又表奏適高節遂授將仕郎試太學助教州遣郡從事躬捧詔書仍具袍笏輿從以禮起之適辭而不受終老於家葬於大隱山縣學有大隱先生碑縣令林叔豹立

冢墓

後漢王修墓在縣西十里會稽典錄云修句章人也漢安二年爲鄞縣令嘗因軍人殺厯陽太守伊曜修誓衆奔入賊營取曜屍葬之咸服其義仕至從事

晉虞瑤墓在五馬山去縣西南六十里虞氏譜云瑤博學強識當時所稱累遷至伏波將軍

晉虞胄墓在橫山去縣東南十里虞氏譜云胄好學不怠仕至散騎常侍嘗居此山死因葬焉其墓猶在至今人呼爲常侍墓

晉虞喜墓在廬洲山去縣東北四十五里夏侯曾先地

志云喜字仲宣會稽餘姚人也晉帝嘗三詔之官至
太學博士封建宣侯

宋朱夔墓在朱墓山去縣西六十里宋書云朱夔字秀
整吳人也州舉秀才歷職中書郎轉台州刺史有林
壑之志卜居此山死因葬焉

梁虞荔墓在鳴鶴山去縣西北六十里梁書云荔會稽
上虞人也以博識聞舉宏詞累遷中庶子卒於官歸
葬此山

梁虞攷墓在東澄山去縣西南三十五里攷舉秀才累
遷至散騎常侍著內典要三十卷

梁建威將軍虞鷺墓在漁溪山去縣西北五十里

梁東海太守虞野人墓在成溪山去縣南三十五里

隋金紫光祿大夫陳詠墓在城門山去縣西南十三里
隋書云詠字休宣仕爲懷安令遷城門校尉會稽從
事屬隋初多故因畱葬此遂以名山

唐張孝子墓在虎胛山去縣西三十里孝子張無擇父
任袁州司馬卒歸葬此山無擇至孝結廬負土三年
不櫛七日絕漿感湧泉出芝草生焉鄉人虞彥之百
餘人詣州舉之都督竇懷正按驗得實以聞屬神龍
多故不遂旌表遠近稱歎官至和州刺史中散大夫

四明圖經卷五

鄞 徐時棟校刊

四明圖經卷六

宋元四明
六志弟六

宋

張

津

等

撰

象山縣

下象山縣在海一隅爲州之支邑後漢東屬鄞縣西屬

章安

章安縣名本鄞之回浦鄉後漢永和三年以鄞唐章安故城遂更其名今在台州臨海縣之東南

神龍二年析二縣地邑始肇名隸于台州然縣以象山

名之者蓋縣有一山其勢壯負雄壓海垠前後瞻望屹

如象形縣控此山因以名之而山陸阻險距屬迴遶吏

民有道塗之勞廣德二年遂割隸明州貞元中定爲中

縣歷五代不改皇朝以地不相屬降爲下縣舊有五鄉

景德三年并爲三鄉

祠廟

祚聖廟舊係東門廟在縣南一百里按圖經舊載其神號天門都督未詳事跡今按東門山在縣南海中去州一千二百里其山與台州宣海縣接境山高二百丈周迴二十五里兩峰對峙其狀如門闊一百五十餘步下有橫石如閘潮退之時奔水衝湧不可輕涉惟波平風息乃可以渡其下有廟號爲東門蓋在宣海之東故以名之其廟神傳爲天門都督或云今置廟處正當古鄞縣東南是承西北天門之勢廟側之

水亦自西北山而來故有天門之稱尊敬其神方之
連率都督行旅往返無不致祀隨其誠意咸有感應
唐貞觀中有會稽人金林數往台州買販每經過廟
下祈禱牲醴如法獲利數倍嘗因祭畢解舟十餘里
欻然暴風吹舟復回不得前進舟人怖甚謂必有忤
於神果誤持胙物而去乃還致廟中更加祈謝即得
便風安流而去永徽中又有越州工人蔡藏往泉州
造佛像獲數百緡歸經此廟祀禱少懈舟發數里遂
遭覆溺所得咸失而舟人僅免焉其廟建置年月卽
無碑碣可考皇朝建炎四年賜今額

昭應廟舊係圓峰廟在縣西北一百四十步皇朝建炎
四年賜今額至紹興三十一年復封靈澤侯耆舊相
傳昔境內歉歲艱食忽有大舟抵岸告邑人曰昨日
中流有漏舟載酒果招吾來者自云居縣西山下及
往訪之乃廟也觀神像乃舟中之人驚愕且拜卽平
其價盡鬻於市人賴全活者甚衆至於旱暵疾疫一
往祈禱無不感應第一以時代姓氏湮沒無傳莫有
以暴白於後世惜哉

顧長官祠在縣城內長官名方字正夫丹陽人皇朝皇
祐末登進士第再調明之象山令視事日召邑人父

老詢民間利害及境內士民善者召而勸之惡者諭而戒之又建學舍率子弟之秀者教之親爲講解誘掖使進於善逾年民大化服俄而方病邑民率錢詣壇廟祈禱者千人方竟不起百里之內號泣思戀如失父母相與立祠以時祀之其爲民愛慕如此丹陽錢君倚毘陵胡完夫皆記其事刻石祠中士大夫以詩頌追美者不可勝記事見皇朝類苑今祠有碑見存上饒何籀撰

山

象山在縣西南六里山中閒起一峰有水源流觀望形

狀如象因以爲名縣坐山鼻之上此所以取而名縣也

東門山在縣南海中八百四十里東西相向其狀如門下有橫石如闕卽漢書地理志所謂天門山也

又新校一葉

象山

祚聖廟

蔡藏往泉州

劉本往下有來字

卽無碑碣可

考

據劉本無卽字

昭應廟

第一以時代姓氏

據劉本無一字

四明圖經卷六

鄞 徐時棟校刊

四明圖經卷七

宋元四明
六志第七

宋

張

津

等

撰

昌國縣

下昌國縣本鄞縣地周環皆海窮東一涯而地不相屬
唐開元二十六年與州同置卽翁山縣是也山在縣東
乃徐偃王所居之地舊址猶存大厯八年海寇袁晁作
亂此邑遂廢皇朝端拱二年置爲鹽場熙寧六年鄞邑
令王安石請於朝復割鄞縣富都安期蓬萊三鄉勅立
元豐元年又割定海縣金塘一鄉隸焉共四鄉爲下縣

鹽場

曉峯場在縣西十二里柳永字耆卿以字行本朝仁廟時爲屯田郎官嘗監曉峯盛場有長短句名畱客佳刻于石在廨舍中後厄兵火毀棄不存今詞集中備載之

祠廟

黃公祠在縣東海中四百里晉天福三年置其祠載於舊圖經非係祀典故事實未詳今按會稽典錄云人材則有黃公潔已暴秦之世豈其人歟

岱山陳大王廟在縣北二百六十里按王名稜姓陳氏字長威廬江襄安人天資義勇志在戡難仕隋高祖

大業中嘗奉辭提師航涉海道擊流求國俘斬頗衆
事見隋史故其威赫譽震海上今胸山有祠號陳將
軍卽王之別廟也皇朝端拱二年建紹興十七年重
修有記進士施知微撰

山

梅岑山在縣東二百七十里四面環海高麗日本新羅
渤海諸國皆由此取道守候風信謂之放洋山後有
一小寺曰觀音按釋典所載觀音住寶陀山在海岸
孤絕處卽其所也皇朝元豐三年改賜寶陀觀音寺
山下有善才巖獅子巖潮音洞皆觀音化現之所紹

車道一
興初給事中黃龜年嘗詣瞻禮俄覩觀音全身出現
存寶具述其異

蓬萊山在縣東北四百五十里四面大洋耆舊相傳秦
始皇遣方士徐福入海求神仙靈藥嘗至此按孫綽
天台賦云登陸則四明天台入海則方丈蓬萊豈其
所乎

東嶺山在縣東北海中四面大洋上有虎豹龍蛇人跡
罕至耆舊相傳古有仙者隱於此山有石碁盤四圍
皆修竹風至則竹枝掃盤絕無纖塵若人使之然

桃花山在縣東南一百二十里耆老相傳安期先生學

道煉丹於此嘗以醉墨灑於山石上遂成桃花紋奇
形異狀宛若天然人多取之以爲珍玩故山號桃花
而鄉名安期實出於此云

石弄山在縣東北九百五十里山石玲瓏東西相懸人
可出入

翁山一名翁洲在縣東二十五里十道四蕃志云徐偃
王居處城基猶存

小茆山在縣西南海中二十里

小竿山在縣東南六十里

回峯山在縣西北一百二十里

西良山在縣西北二百里

長塗山在縣東北二百八十里

蘭山在縣東北三百里

崑斗山在縣東南三百五十里

三姑山在縣西北八百里

良港山在縣東北九百里

深水山在縣東北九百五十里

莆嶽山在縣東北九百五十里

蛇山在縣東北一千里

斜山在縣東北一十二百里

大七山在縣北一千四百五十里

曉峯山在縣西二十里

東勾曲山在縣東五十里

砂羅山在縣西南海中二十里

大茆山在縣西南五十里

大竿山在縣東南八十里

麻罍山在縣東南一百里

洋山在縣東北一百里

蛟山在縣東南一百里

長白山在縣西北一百五十里

登部山在縣東南一百五十里

東乳山在縣北二百里

西蘭山在縣西二百里

茅山在縣南二百二十里

西岱山在縣西北二百四十里

東岱山在縣北二百五十里

大若山在縣南二百五十里

正策山在縣西北二百五十里

吳農山在縣西北二百八十里

如岸山在縣西北三百里

橫子山在縣西北三百里

東蘭山在縣東北三百里

元雀山在縣東北二百七十里

煙岸山在縣南三百五十里

浮塗山舊名浮塗山在縣南四百里

礪石山在縣南四百里

滕魯山在縣南四百里

黃公山在縣東南四百里

西胸山在縣北四百里耆舊相傳爲仙人所居

馬秦山在縣東南四百里

黃沙山在縣東南四百里

冊子山在縣西北二百五十里

西枯山在縣東北四百五十里

徐公山在縣東北五百五十里

西桑山在縣西北四百五十里

桑子山舊名桑石山在縣東北六百里

東曉山在縣東北六百里

東枯山在縣東北七百里

石蜀山在縣東北七百里

東陶山在縣東北七百里耆舊相傳爲仙人所居

川石山在縣東北七百里

北壁山在縣東北八百里

西須山在縣東北八百里

馬跡山在縣東北九百里

須皓山在縣東北九百里

大洋山在縣北九百里

落華山在縣東北一千里

右並在本縣海內并大海中耆老相傳有此山名不見載籍難以稽考海外復有藿山黃石雞鳴壁下神前東豸西豸碓砧石馬青閣大板洋橫秀山馬乳海

西稠江宜山馬碁沙嶽列表五嶼虎頭三山螺頭門
鹿盤嶼方橫窄額白踏大額雲嶼嶼嶼山沈家門青屯
黃屯北砂順母雙嶼龍嶼龜鼈丁興泗洲堂黃隆場
岸畫栲門弔嶼小七灘山黃母羅門大小枝絲獅石
牛大小錫廟址等五十五山雖有其名皆莫知坐落
所在今姑附之於後云

水 湖潭井

富都湖在縣東北八十里舊名萬金湖周迴三十里概
田二百頃

洩潭在縣東北三十六里萬壽院境內其潭在山腰石

上深淺莫測凡遇旱涸祈請輒應

惠泉井在縣東北一里深二丈邑人皆汲用之嘗有白蛇出現皇朝端拱二年開鑿

古跡

安期先生洞在馬秦山去縣東南四百里耆老相傳安期生得道隱於此洞因以名鄉焉

四明圖經卷七

鄞 徐時棟校刊

四明圖經卷八

宋元四明
六志第八

宋

張

津

等

撰

九經堂賦

并序

胡幹化

太守李侯以雄才碩量剖符此邦下車之日首布德化
訟簡刑措政風肆行冬十二月游桃源因故基命工掄
材開九經堂而新之發石刻於黃壁收斷編於秋草士
有成德人知向儒明年春合樂以落成之且命幹化賦
之幹化謂茲堂廢幾百年而再造於一時非特踵前人
之餘芳亦所以揚先王之茂烈是宜有鴻儒碩宿發越
辭章播金石亦被管絃享鬼神而薦宗廟僭越不知其

愚賦二千言以述盛事其詞曰

於鍊哉皇帝卽位之二年也景星明慶雲翔日月耀虹
霓藏風威百蠻鏡照四方乃眷四明位於東南之陽負
溟渤控扶桑倚巨鎮吞長江規圓杯浮奠乎中央睿澤
弗渥淳風未揚命李侯兮守是邦虎符東分赤轂載佩
縹金輓以爲車擁紅旌而爲蓋介節俊厲英風爽邁悍
卒武夫氣奪而魂散老姦宿賊星分而蟻潰布冬日之
愛戢秋霜之威畝不輟耒室無停機鳴絃乎千室安瀾
乎四陲宣化承流若時覆載民無札瘥物無疵癘甘雨
飛兮綠野祥雲擁兮紫塞簡書旣靜囹圄旣空我職旣

修我民既同乃乘雲車控玉騮擁堅甲攢奇鋒金鱗耀
而月彩煥兵氛凜而霜雪濛介乎譙門之南入乎桃源
之東沖融窈窕兮紛煙雲之橫驚突兀臃腫兮森觀閣
之相重迺風露以爲樓兮來空翠於羣峯呀泉脈以爲
池兮落天鏡於空中孤亭突波兮浮層疑之飛鯨橫橋
插天兮亘綵錯之鮮虹集余亭兮侯弓侯矢升余堂兮
載笙載鏞霧擁雲隨高車載馳採三老之遺言升九經
之故基覽遺跡之長存悼前人之莫追拂綠苔於砌石
弔遺言於折碑春風乍驚兮飄荒煙之緜緜落日夕暝
兮動芳草之離離鸞鳳矯翅兮紛鬪戰之螻蟻虎豹潛

形兮聚羣嘯之狐狸乃謀乎卜筮考乎蓍龜測日月之
瑞方究星宿之躔維踐層巒以眇高浮疏川而相卑軋
地軸以盤根摩天倪而勘規均四氣之和卜三農之隙
不家至而申令因于來而爲役搜抉乎蒼莽之楚探窮
乎茫洋之澤剔土髮以爲材琢山骨以爲石運斤成風
乃紀乃綱累以刻楹承以平堂建以雲楣投以虹梁棟
上極楹四旁擁雙闢開六牕鏤染山擎華棖翼張重簷
鴻鸞雕栢龍驤四宇敞兮飛鸞舞鳳罽思麗兮垂纓布
瑞玉題朝燠兮規日印月皓壁畫鮮兮凝脂裁肪古礎
平平兮瓊瑤鍾澗碧瓦鱗鱗兮結綠含光近而視之星

輝而霞燦遠而邈之煙飛而霧揚大勗崇基弗宥弗長
宏規偉度旣麗旣壯巨風霆之表兮插雲霓之間橫入
維之脊兮扼四方之吭辨山川之殊形區邇遐之異類
絡阡陌之縱橫分郊原之向背縞練橫兮長江曉轉
菱花斜判兮平湖亂漲淒風送響兮日墮瑤海澹露含
輝兮月湧煙嶂暖浮畫棟兮春雲藹藹清泛玉琴兮炎
薰盎盎香風滿地兮落金波之桂子素影橫空兮凍銀
潢之雪浪於是點翠幕張紅筵飛錦書聘羣賢收浩景
於雲間弄天風於日邊煙斜霧橫麾節行焉電走雷旋
軒車至焉和鸞雍雍衆賓集焉玉佩鏘鏘太守揖焉蘭

馨桂烈衆饌陳焉鳳嘯龍驚衆樂作焉於是秦國公子
以辯爲喜瞪目而視捉襟而起揖晉都先生而語曰昔
江南太守典洪都之新府修滕王之故事合樂大饗羣
賢畢至使王勃賦之侈廣其意傳流潤色承以不墜亦
可以贊刺史之遺德揚當世之盛美者矣今先生電掩
長舌星垂方綺舞動長鯨氣吐秋虹升高堂集羣公適
清宴之未闋俾流景之方融亦可踵前世之遺芳以揚
前人之素風乎先生悠然而笑曰然乎哉昔伏羲氏之
王天下也四海文明鑒乎太清地不愛其寶天不愛其
靈使神龜出洛負書而行伏羲得之網羅造化包括堪

輿融結山川吐納風霆制爲八卦分爲四營布六爻之
縱橫規兩儀之降升文王繇之而其道悉備仲尼翼之
而斯文大盛蓋取乎道之爲妙是謂乎易之爲經斷三
皇始五帝上逮乎夏商之統下及乎秦周之系典謨貢
範訓誥命誓陳禪遜之紀綱列君臣之分際軌五行之
變化位九州之形勢足以扶天地之運開日月之蔽流
睿澤於天下鞏皇圖於千世孔壁藏之而簡編弗墜伏
生誦之而典章次第蓋取乎事之遺跡是謂乎書之爲
制耄老黃童小夫賤工或去國之大夫或列位之三公
覽時事之興廢觀盛德之形容情態交乎前美刺興乎

中詠山川之高深記草木之纖穠測方軸以下申摩圓
清而上通蓋取乎譎諫之義是謂乎古詩之風秉素王
之符抗元聖之辯提褒貶之雄柄揭賞刑之大本鬱者
必發微者必闡亂者必削惡者必翦紀之以歲月分之
以晦旦文之以禮樂飾之以誅勸扶日月而上出障江
河而東轉蓋取乎紀事之實是謂乎春秋之典下採成
周上追陶唐揚列聖之素風擷前人之遺芳其制禮也
措三百以提經其辨儀也周三千而布綱其設爵也建
六官而等位其列土也面五侯而內王朝觀宗遇所以
交諸侯而揖賓客冠昏祭祀所以會男女而宣死喪俎

豆籩鼎所以辨彝儀而昭物軌犧牲粢盛所以享上帝
而薦先王陶匏笙竽所以洽淳風而導和氣圭裳冕弁
所以祀清廟而朝明堂此二禮之垂經所以器範而川
防隨流揚波鈞彜貫理喉襟大道之要羽翼仲尼之旨
或先經而始事或後經而終義或依經而辨理或析經
而合異微而顯兮如長雲翳星炳而不耀志而晦兮如
巨浸含山鬱然高峙婉成章兮如回鱗盤鳳培風映流
盡不汚兮如廣漢清江觸山蟠地此三傳之餘訓所以
提領而振紀夫然揭大訓示丕彝包裹太極斡旋二儀
秦火熾烈兮斯文不焚梁風浸淫兮斯文不滴嵩嶽可

磨兮斯文不磷江河可竭兮斯文不淄夫潛龍雖神無
慶雲不能雄升海鵬雖大無扶搖不能高飛日月雖明
無陰陽不能扶其運天地雖大無風霆不能示其威是
必表大訓之宏規存素王之遺跡申以齋戒擇以日月
篆以丹青鏤以金石發天語飛宸章錫玉札示四方付
之有司以實茲堂焉豈無制而然宏規下蟠法持載於
坤也宏宇上庇均覆壽於乾也大楹古礎柱石堯舜也
山棗層巒鞏固羲軒也離離羣柄矩義之方也差差衆
椽規智之圓也望之崇然形德之體也卽之沈然蓄道
之淵也亞以白盛質以示素也飾以丹漆潤以容文也

若回若翔樂之和易也如軒如翼禮之周旋也通衢修
塗敞孟荀之步也重垣壯址闢楊墨之路也誅茅伐棘
夷老莊之蔓也除狸薰鼠去申韓之蠹也清風掃門洗
情田之氛也明月在牖開性天之悟也是故由不正者
不能得其門行不方者不能窺其牆道不深者不能入
其室志不高者不能升其堂不味於淡不能探書林之
實不玩於彛不能擷文園之芳秦國公子撫席而起稽
首再拜目不登高山不知天之爲蓋不臨深溪不知地
之爲載不聞先生之言不知九經之大

古詩

對酒憶賀監二首

并序

李白

太子賓客賀公於長安紫極宮一見余呼余爲謫仙人
因解金龜換酒爲樂歿後對酒悵然有懷而作是詩
四明有狂客風流賀季真長安一相見呼我謫仙人昔
好盃中物醜爲松下塵金龜換酒處卻憶淚沾巾

其二

狂客歸四明山陰道士迎勅賜鏡湖水爲君臺沼榮人
亡餘故宅空有荷花生念此杳如夢淒然傷我情

歸四明

胡幽貞

海色連四明仙舟去容易天籍豈輒問不是卑朝士

衆樂亭

王安石

使君幕府開東部名高海曲人知慕
艤船談笑政卽成
洗滌山川作佳趣平泉浩浩銀河注
想見明星弄機杼
載沙築成天上路投虹爲橋取孤嶼
掃除荆棘水中央
碧瓦朱甍隨指顧春風滿城金板舫
來看置酒新亭上
百女吹笙綵鳳悲一夫伐鼓靈鼉壯
安期羨門相與游
方丈蓬萊不更求酒酣忽跨鯨魚去
陳迹空令此地留

前題

鄭獬

使君何所樂樂在南湖濱有亭若孤鯨
覆以青玉鱗四
面擁荷花花氣搖紅雲使君來遊攜
芳樽兩邊佳客坐

翠茵鄞江鮮魚白如銀玉盤千里紫絲蓴金壺行酒雙
美人小履輕裾不動塵壯年行樂須及辰高談大笑畱
青春游人來看使君遊芙蓉爲楫木蘭舟橫簫短笛悲
晚景畫簾繡幕翻中流貪歡尋勝意不盡相招卻渡白
蘋洲日落使君扶醉歸遊人散後水煙霏紫鱗跳復戲
白鳥落還飛豈獨樂斯民魚鳥亦忘機使君今作螭頭
人

前題

吳 充

使君新自四明歸邀我同爲衆樂詩山川可愛惜未見

畫想夕思心爲罷恍然神遇若有得齋身乃在天之涯
漲海連空四無岸天吳卻坐鮫人觀以手揮弄日月丹
能令桑田變瀾漫海邊偶到山城中山城二月多春風
牛羊閒暇夕陽晚樓閣參差朝霧濃一湖山溜佛頭綠
環似翠屏屏六曲人煙擾擾事嬉遊落花啼鳥更汀洲
中爲臺榭闢十二上有藻井排文楸旁人指點此何許
云是四明行樂處此樂爲民非爲身始自集賢錢使君
使君風韻誰之比政事次公詩短李醉憑熊軾勸耕疇
狂取螺盃翻舞袂儂愛使君君勿歸詔書奪去知何爲
聞侍玉皇香案側銀臺深阻無消息意迷卻悟坐空齋

忽省君詩昨日來，墨紙爲君書所見。不知衆樂誠然哉。

前題

馮浩

嘗聞衆樂亭，未窺衆樂景。今蒙貺新詩，若得暫觀省。萬象盈紙來，孤風隨筆騁。丹青慙近功，造化與遙領。因識主人懷，殆非繩侯政。所寄嬉游中，期歡衆庶競。無俾一夫愁，將和四時盛。此而推是心，況乎持大柄。青山綠水佳，百草千花勝。吾將因宦游，異日細謠詠。

前題

王益柔

四明舊說南湖好，歲久瀕厓變涂潦。建旟一日得賢侯，千里山川眞再造。偃月堤成車馬道，湖光如截天如抱。

鴛鴦瓦影亂鳧鷖綠柳環堤花映島珠宮貝闕競來還
泉客鮫人爭獻寶春風浩蕩波濤起髣髴仙人騎赤鯉
金盤下筯飽鱸魚鹿事茫茫隔煙水都人士女從如雲
絲竹清音兩岸聞飲酣落筆歌綠水爛漫天葩飄遠芬

送豐稷

曾鞏

桃華染破南山青漢江此時春水生客舟相語人夜起
勁觴亂江羣鴈聲之君飄泊動歸思告我舉裝千里行
闕材壯思風雨發綠鬢少年冰雪清讀書一見若經誦
下筆千言能立成精微自得有天質操行秀出存鄉評
嗟從薄祿困流滯能誘鄙俗銷紛爭絃歌躬勸士強學

田里堵安人力耕嗟予據案但盡諾遇事縮手方蒙成
雖知璞玉難強獻欲挂塵榻空含情歲寒不變迺知確
物理先否終當亨維舟且盡今夕語明日帆隨白鳥輕

悼四明杜醇

王安石

杜生四五十孝友稱鄉里隱約不外求耕桑有妻子藜
杖牧雞豚筠筒釣魴鯉四時沽酒歸亦不乏甘旨天涯
一杯飲夙昔相逢喜談辭足詩書篇詠又清泚都城間
越客安吾常在耳目月未渠央如何棄子死古風久凋
零好學少爲已悲哉四明山此士今已矣

憶鄞縣東吳太白山水

王安石

孤城回首距幾何憶得好處長經過最思東山春樹靄
更憶東湖秋水波三年飄忽如夢寐萬事感激徒悲歌
應須飲酒不復道今夜江頭明月多

書會別亭

王安石

西城路居人送客西歸處年年借問去何時今日扁舟
從此去春風吹花落高枝飛來飛去不自知路上行人
亦如此應有重來此處時

寄育王山長老常坦

王安石

道人少賈海上遊海舶破散身波浮抱金滿篋人所寄
吹簾偶得還中州羸身歸來不受報祇取斗酒相獻酬

歡娛慈母終一世脫棄妻子藏崑崙
蒼煙寥寥池水漫
白玉菡萏吹高秋夜燃柏子煮山藥
憶此東望無時休
塞垣春枯積雪留沙磧盛怒黃雲愁
五更正馬隨鴈起
想見鄒鄒花稠稠百年夸奪終一
正世上滿眼眞悠悠
寄聲萬里心綢繆莫道異趣無相求

和馬粹老修廣德湖

舒 直

古作重虛始功利故能永末俗紛錐刀
往往附光影此
幾百歲餘興廢屢動靜七鄉十萬家
利害寄俄頃
壽張好惡曹暄聒亂池
逼使君武陵添明潔
水中荷坐瀟黃
堂春獨得意外景
登臨蒼蕪沒歎息
民不幸一日山水

光蕩漾出荒梗黍禾雜菰魚狼籍被它境人指白鶴祠
慇懃竊有請衣冠儼羣公一一畫眞鯁斯人豈可作庶
用薦遺秉公平且我去何以慰鄉井願屬丹青手千載
共觀省

題它山善政侯兼簡鄞令

舒 亶

嗚呼王封君心事鬼出沒驅山截長江化作雲水窟旱
火六月天萬棟掛龍骨蕭條一祠宇像設何髣髴破屋
夜見星漏雨溼衫笏杯酒謝車籌茲事恐亦忽我聞古
先王報施必稱物矧今崇佛宮民力殆欲屈豈無制作
手一爲起荒菲李侯仁賢資撫字良屹屹可但清似水

方看健如鶴沈跡千載後行且見披拂陰功世易忘遠
慮俗多嘒勉哉君毋遲斯民久已鬱

題放生池

舒 亶

南州幾萬家舟楫江湖上罾羅竭魚鼈方饜日腹養何
年長者子於此事脫放藻荇被清流春風不驚浪直鈎
亦何心明珠豈所望落日倚朱欄無言獨惆悵

題水月橋

舒 亶

長空瑩如磨平湖淨無滓萬里夜寥寥清光墮寒水松
風吹更聞沙鳥睡不起徒勞野猿捕謗作卒珠比相對
倚朱欄時有逍遙子

遊翠巖六首

舒 亶

繆悠此投閒邂逅如得請終日對林僧是樂非世境千
秋紙上塵萬事空中影既往悔可追無能味何永仍幸
甘露音時時灌吾頂

其二

翠巖老禪和欲退未容請聊許隱堂人先占廣軒境高
松有寒清孤雲無定影草暖幽澗香鳥啼清晝永一笑
碧雲傍未羨匡廬頂

其三

聊謝都城遊來赴道人請冥懷麋鹿羣回首冠蓋境深

一 草 卷 八
三
瀉泉石聲蕭森松檜影風帽何妨顏蔡徑敢辭永還聞
鐘磬音爲我下雲頂

其四

先生益言歸小子願有請出來陶淵明結廬在人境閒
抱無絃琴靜弄南窗影勝事幾人知高風千載永何當
理籃輿步月下孤頂

其五

願問海潮音幾煩檀越請有物還有機無心卽無境何
當雪衲身重現水月影高臥與世疎孤坐共夜永時時
掛西窗溪光照霜頂

其六

欣聞厭冥煩頗亦謝造請孤鶩出塵埃勝踐得真境萬
籟發靜音千崑度空影無味道終憐有役慮真永會當
立茅茨望子蒼岑頂

再遊天童山回同吳與權諸友夜集

舒 亶

太白嶺崑幾百尺仙人一去無消息臨雲時復倚欄干
獨看千峯萬峯碧昨夜長鬚城裏回報道湖上秋風來
醉圍雨過月臺冷籬根白菊看看開卻杖青藜趁流水
目送征鴻下山嘴篷船答浪遶叢蘆咫尺烟汀幾萬里

忽見江頭江月白紛紛笑語城東陌一樽北酒一枰碁
未到懶堂猶是客

遊承天望廣德湖

舒 亶

桃源二月春風起是處穠華有桃李調笑聞聲不見人
遊人只在華山裏華山逋客來何遲隱隱茶林隔烟水
滿眼相思寄碧雲獨立城南望山觜

送韋太守

舒 亶

四明山水東南表海鼇背上三僊鳥麗譙高逼斗牛寒
一曲梅花萬家曉太守文章建安骨爽氣冷侵寒月窟
雌堂水洗火符空明光卻擁荷囊笏有客醉園雙鬢老

宦情文思如秋草紫雲夢斷玉龍飛年年送客西城道
曾是野亭同問柳綺裘紗帽金船酒長安宮闕九天邊
肯爲江籬回首否

粹老使君前被召約往它山謁善政侯祠旣不
果以書見抵謂可歎惜并示廣德湖新記因成

長句奉寄

舒 亶

長江滾滾西南流秋水時至狂不收大浪似屋山欲浮
王侯神智禹所啾萬鬼琢石它山幽梅梁蠱窟臥龍虬
咄嗟湍駭就斂擎巨靈縮手愚公差障成十里沙中洲
支分脈引聽所求赤旱稽浸民不憂那得蟲蝗隨督郵

汗邪甌窶滿車篝斯民飽暖何以醑廟貌突兀寒灘頭
歲歲雞黍祠春秋老農擊鼓稚子誣當時人物紛鴈鷗
豈無鼎食腰金籌朽骨往往空蒿丘姓名幾復人間畱
惟侯惠施膏如油江聲浩浩風颼颼千古不見使人愁
拔俗萬丈山標嶒使君不減裴商州下車百蠹隨鋤耒
一笑四境無瘡痍天閭老步須驩驩已聞歸作金華遊
欽賢訪古意未休畫舫載酒岸鳴騶約我與往置脯臠
冠蓋紛紛暇莫偷搔首悵望情縹緲我問使君亦何尤
西湖萬頃蛟龍浪幾年荒蕪今則修鑿鼓弗勝財不培
長堤岌嶭高岑樓寫有滄兮蕩有溝餘波北注引漕舟

桑麻被埜禾連疇鶴鶴白鳥雜遊鯨菰蒲菱芡屢採搜
柳楊成幄蔭道周耕漁呼歌羸病瘳使君之賜侯可侔
天邊旌旆看悠悠父老雪涕爭攀輶地僻借恂恨無由
高文摛秀春華抽豐碑峯律鏡銀鈎千年空此畱海陬
君知此日思君不還如今日人思侯

登育王明月堂

王 亘

引月貯虛堂堂高附南極我當盛暑來萬象生秋色堂
豈朝朝新月亦有時食一寸坐禪心萬古磨不得

同舍弟泛舟西湖登晝錦堂步至紫翠亭望懶
堂景物懷故龍圖舒先生

王庭秀

城中十頃湖雲水相演漾春風破冰谷拍岸新流漲平
鋪鴨頭綠澹沲蒲萄釀朱蕘媚孤嶼梵宇麗相向萬瓦
生清暉千花聯錦帳晨曦照炯炯芳氣浮泱泱日暮姿
態妍煙霞渺空曠誰將水仙境聊借詩人仗臥護五羊
城追懷老詩將微吟示清野塵職得閒放變化無端倪
虛無落名狀坐令湖上景勝絕神字王當時經行地藻
麗隨屢杖斯人今則亡物色亦推喪它年牛馬走曾拜
丈人行塵埃久漂泊歲月成漫浪問訊懶堂居松菊忻
無恙尙意壁閒聲時賡朱絲唱撫事重興嗟陳迹徒悵
望哦公十洲詩風月爲悽愴

遊香山佛跡

周 鏞

靈山名達蓬香水露舊荷龍祇久覆護雲物翳深谷拂
衣向劫中神斧斷蒼玉至今天人尊靈跡印金粟頰聞
開士識飛錫隱嵩麓坐令湖海客香供走川陸巍巍虔
報地色相露金屋緇想舊中堪猶能慰心目豔興訪蓮
社一笑欣自足撫事動幽尋疇能念榮辱松檟長如見
餘力付碁局更覺夢中身翛然百無欲

書隱潭

鄭修輔

在昔知何人築破青山骨泉泉直下來千尺馮侯忽兩
壁蒼翠開一陣風雷突傍無塵埃蹤中有蛟龍窟寒氣

不可嚮猛勞豈能屈安得當年爲霖濟羣物

題東寺松石小軒呈同遊關彥長明府

盛次仲

一松偃蹇蒼龍盤一石崑崙怒虎踞漫來題作龍虎軒
便恐風雲卷騎去

律詩

送賀監歸四明應制

李白

久辭榮祿遂初衣曾向長生說息機眞訣自從茅氏得
恩波寧阻洞庭歸瑤臺含霧星辰滿仙嶠浮空島嶼微
借問欲棲珠樹鶴何年卻向帝城飛

衆樂亭二首 有序

錢公輔

衆樂亭居南湖之中南湖又居城之中望之眞方丈瀛洲焉以其近而易至四時勝賞得以與民共之民之遊者環觀無窮而終日不厭孟子曰獨樂與衆樂孰樂不若與衆衆樂之名於是乎書旣又爲詩以記眞景之萬一云

誰把江湖付此翁江湖更在廣城中暮成世界三千景占得鵬天九萬風宴豆四時誼畫鼓游人兩岸跨長虹
它年若數東南勝須作蓬丘第一宮

其二

勢壓平湖四面佳，好風明月是生涯。
鯨鯢背上浮三島，菡萏香中放兩衙。
屏列已疑雲母淨，簾垂不待水精奢。
此心曾笑元丞相，終日樓臺爲一家。

前題

司馬光

橫橋通廢島，華宇出荒榛。
風月逢知己，湖山得主人。
使君如獨樂，衆庶必深嗔。
何以知家給，笙歌滿水濱。

前題二首

邵必

海邊民物鮮歡娛，太守經營與衆俱。
園圃新陰多杞柳，池塘生意足魚蒲。
長空不礙高飛鶴，淺水兼容短脛鳧。
此樂有誰知，我趣歸來紅旆日西晡。

其二

城外千帆海舶風
城中居市苦憧憧
幾生佳景爲民老
一日賢侯與我同
道上槐陰連畝翠
水邊人面照花紅
寄言樂有時還盡
徒見甘棠憶召公

前題二首

吳中復

賢侯新葺水雲鄉
虛閣崢嶸綠渺茫
波面長橋步明月
人家疎樹帶殘陽
風中白鳥侵煙去
雨後紅蕖擁袖香
從此郡圖添故事
歲時遺愛似甘棠

其二

煙波空闊岸低回
草綠花紅處處堆
一片湖光分島嶼

四邊山色入樓臺從前未有吾民樂此地欣逢刺史來
目斷鄞江何日到京師只得畫圖開

前題二首

陳汝義

聞說湖亭又一新不徒行樂樂斯民水光剩占鷗鷺地
人意常同桃李春試展畫圖清俗眼况專閑席傲天真
使君已陟螭頭貴應爲煙雲入夢頻

其二

遙思湖上自由春醉踏吟看屬使君水底天光開靜鑑
岸頭花氣連紅雲島浮虛檻橋橋接風翼時鐘寺寺聞
清墨新名人會否不將民樂廢民勤

前題

張伯玉

勾章太守錢君倚湖上新爲衆樂亭花木豈徒游子愛
笙歌長與郡人聽坐來高韻天風起飲罷餘香夕雨零
安得凭欄縱吟筆玉觴遙對數峯青

前題

陳舜俞

湖光野色著人衣衆樂開亭此處宜擊擢高歌山自響
踏青紅影岸相隨消除增繳容鷗鳥改換風煙入柳絲
荇菜藕花應見憶短篷孤榜獨來時

前題

章望之

是水爲佳境中城枕碧湖樓臺萬室近物象幾州無太

守恩千里新亭望一都地勞吾卜築景與衆游娛宇色
低欄外波光上屋隅鴛鴦宜繡幕翡翠失深蘆九夏荷
開簟三秋芰洗盂山林何處異江海此情孤夜氣寒蟾
媚晴暉落日殊畫橋斜映柳細草亂縈蒲漁棹開浮藻
風簾散戲鳧野僧畱曠蕩行子過踟躕逸興攀銀漢明
昨湛玉壺圖經終煥越歌詠已流吳壯觀嘉時序招來
好酒徒樂僮優好伎唱女榘名姝閉戶誰能事宜人正
丈夫樂邦方美俗鼓舞荷唐虞

前題二首

胡宗愈

平湖拍岸海潮通亭在平湖杳靄中花豔含春雲鳥晚

波光照夜玉壺空動搖人影兩橋月洗滌塵襟四面風
野老半酣亭下笑漁樵今日與民同

其二

平蕪十頃綠含煙勝事興衰已百年島榭設隨民意樂
溪山應喜主人賢點妝野趣灘邊鷺髣髴妖容水上蓮
日月流風轉謠俗棹歌長在釣魚船

三江亭

潘良貴

假守衰頽病日侵湖山雖好倦追尋登城忽覩三江水
快我平生萬里心聊築小亭怡父老敢承佳句粲珠金
春濤正待諸君賞更拂詩牌看醉吟

和前韻

蔣璿

安仁不放二毛侵，爽氣凌虛玉萬尋。
談笑薄施三昧手，登臨誰會五湖心。
倦游方戢冲天翼，高賦難賡擲地金。
怪得朝雲飛畫棟，夜來曾聽老龍吟。

和前韻

顧文

詞源倒峽勢奔侵，綆短那容汲萬尋。
望屬滄浪驚鶴唳，志存流水識琴心。
揮毫句句囊盛錦，拜賜人人袖有金。
不日都俞在廊廟，更聽虎嘯應龍吟。

和前韻

王珩

潘郎未覺鬢霜侵，佳致乘閒得得尋。
古岸渺茫分遠渡，

飛蕢虛傲快人心融樽想見頻頽玉季諾由來雅勝金
野老固慚東閣客何妨同作醉翁吟

和前韻

汪思溫

危亭聳觀與雲侵勝槩何勞杖屨尋回合江山真有意
去來鷗鷺本無心歡聲洋溢均千里好句清新抵萬金
四海倚需經濟手豈容長對白頭吟

和前韻

薛朋龜

爽氣寒光四壁侵青山千仞水千尋遠觀吾里瀛洲路
悵望誰人魏闕心春到已多鳴珮玉酒酣應有解貂金
紫微太守經營巧消得時賢次第吟

和前韻

王伯庠

使君不受二毛侵，杖屨逍遙得勝尋。
撥遣簿書聊永日，登臨山水亦何心。
殘梅墮雪垂垂白，弱柳搖春淡淡金。
倚矚大江供一笑，幾多襦袴在謳吟。

和前韻

鄭若谷

望遠登高萬象侵，元戎端不爲花尋。
未誇鴛鶴蓬山路，應壯斬鯨遼海心。
小艇鱸肥盤膾玉，危欄客醉枕揮金。
中流擊楫雄圖遠，回笑三閭澤畔吟。

和前韻

陳晉錫

神襟百慮不容侵，勝槩乘閒偶訪尋。
趺坐豈無觀水術，

臨流應有濟川心，斂將蓬島溶溶氣。散作陽春字，字金
郢曲調高人寡。和微生，何敢綴雄吟。

和前韻

陳栖筠

紅塵一點不相侵，下瞰澄江幾萬尋。地接海潮分鼎足，
簷飛鳳翼峙天心。三山有路雲收幕，午夜無風月涌金。
欲識龔黃報新政，滿城爭唱使君吟。

十洲閣

王巨

山川如幻閣長秋，一鳥飛來伴九洲。不礙漁樵雙槳過，
何妨羅綺四時遊。雲疑泰華分張去，水憶蓬瀛散漫浮。
禁苑未知湖海樂，生綃寫取獻中州。

次韻明州戶部遊蔣園

王 巨

採蓮橋下路，皂蓋拂雲來。
塵壓隨軒雨，風生避暑臺。
酒緣佳客盡，花爲使君開。
憂患西溪舊，滑州西溪常陪樽俎相忘此

日杯

又次韻登靈橋門晚望

王 巨

思波和氣兩溶溶，萬戶樓臺紫翠中。
渡水虹霓輕縹緲，隔河牛女淡朦朧。
眞仙路指三山近，粒食人歌四輔豐。
旌旆欲歸歸未得，滿船風月載漁翁。

謝太守劉吏部示西湖圖用豐侍郎韻

王 巨

四明太守愛西湖想像桃源舊日圖不放塵埃生水面
爲傳風月到皇都花開別嶼千機錦稻熟鄰田萬斛珠
聞說兒童騎竹馬至今昂首望通衢

和郡守彭吏部按視湖亭凡二首

周鏐

使君風味歷荊州每爲吾民樂更憂錦里篇章推唱首
浣溪光景促遨頭行春預約花欹帽把酒方欣雪點裘
嶽史年來慙吏隱扳輿時得從公遊

其二

雙虹倒影上簷楹碧水澄空一鏡明野草閑花無限趣

短蓼幽榜不勝情已知風月隨人意聊爲湖山載酒行
卻訝錦囊賡夢草坐令詩興繞宸瀛

西湖三首

周 鏗

曉鏡初開淑景明使君風味一般清舟從菡萏林中過
人在鯨鯢背上行妙舞屢翻紅藥鷺清詞時啣紫薇鷺
賡歌久矣虛前席肯向樽前戀麴生

其二

使君修禊與民遊十里笙歌水面浮動地雄風雲外起
截天雌霓雨中收登臺已有難并樂擊壤寧無寡和憂
卻憶內家新賜火海棠無數出牆頭

其三

牛鞭初動轉新鸞夢覺池塘選勝行水鏡光中千騎合
山屏影裏萬艘橫雲從布穀原頭過雨向催詩筆下生
藻繪昇平知有待閣梅先已賦詞羹

澄輝閣

周 鏐

雄建俯空閣下瞻霄漢浮眼將雲漠漠心寄水悠悠日
暖鳥飛鏡月涼魚弄鉤行期分此景家在甬西頭

馮氏萬金樓

周 鏐

幾年江上夢黃鶴意悠悠百尺獨臨水萬金難買秋林
聲喧藥市欄影枕漁舟應有壺中客分身向此遊

題清斯堂

周 鏐

萬物本空寂，浮生方沼中。
鷗輕時出沒，萍散只西東。
檻外風初息，天邊月正融。
了無塵可濯，危坐照衰翁。

余至象山得邑西山谷佳處，暇日過遊，因其亭

榭泉木，雜爲十詠。

林 旦

西谷

山桃源以西至應真絕頂，其爲西谷。

半昔山林性，今來水石鄉。
栽花尋秀壠，泛酒掬滄浪。
地曠春常早，雲陰夏自涼。
歲成還北去，魂夢此難忘。

應真亭

亭在蓬萊山頂，子酌透瓶泉，得石井欄，記卽大中時應真鄉，遂以名之。

我愛井泉清，來逢井上銘。
佳名知故里，絕巘爲開亭。
目

外仙舟遠雲間棋木青茫然千古意誰與問滄溟

桃源徑

十畝紅桃徑穿花過水西清泉來不斷行客到應迷露
錦披芳塢晴霞倒碧溪年年春意在當會自成蹊

蓬萊泉

卽煉州山
透瓶泉

採藥瀛洲去扁舟竟不還黃金成海外故井獨人間乳
滴巖花潤苔封石宇斑空令千載後猶復望三山

濯纓亭

早歲逐浮名塵埃已倦行浩然臨絕岸聊並振頰纓世
事隨波遠吾心白水清營營朝市路誰識孺歌聲

竹園亭

昔人嘗種竹此意爲山林野翠何凌亂
羈懷得放吟化龍知有節待鳳豈無心
悵望山陰客飄然不可尋

曲水亭

崑瀟抱山急傳觴何太頻迴看野客醉
還笑濁醪醉漢曲人方遠藹亭跡已陳
勞生無足校酣放卽天真

灌木亭

行行竹間徑時此一登臨爲有凌霄幹
長垂滿座陰海雲生遠目山月照閒心
幸免材爲累無言弃擲深

觀澗亭

萬古淵源會憑欄試一觀雲濤誰可際勺水自爲難日
月間中永乾坤物外寬幽人休悵望平地亦波瀾

射圃

百步開新圃彎弧注采正樽罍供樂事金鼓疊懽聲
敏手徒爲妙中心自要平何人能舉解觀堵定縱橫

西谷觀瀾亭

許將

危亭高處倚巖隈西望蒲昌海浪迴山戴鼇頭天外出
水浮鱗穴地中來千重側崦扶搖沒萬里分流混沌開
令尹觀瀾知道大三年窮邑更淹才

送明州王大卿

王安石

大庾才臣有此州，昆雲今駕鹿轡游。從來所至邦人喜，
眞復能分聖主憂。千里封疆何足治，一時名跡故應留。
屬城舊吏雖疲懶，尙可揮毫敵李舟。

寄育王大覺禪師

王安石

單已安那示入禪，草堂難望故依然。山今歲暮終岑寂，
人更天寒最靜便。隱蹟亦知甘自足，憑心豈吝慰相憐。
所聞不到荆門耳，人老禾新又一年。

弔王致先生

王安石

處士生涯水一瓢，行年七十尙蕭條。老妻稻下收遺乘，
稚子松間拾墮樵。雖有聲名高後世，且無館粥永今朝。

窮魂散漫知何處甬水東西不可招

和馬粹老四明雜詩聊記里俗耳十首

舒 亶

百粵喧譁外三江指顧中耕桑遺俗在草木故城空

節

郭也近澤知田美

俗重近澤田

多魚驗海豐由來形勢地越絕

控遼東

其二

澄水舖千練平山伏萬犀月橋蓮棹小春圃酒旗低蓬

島雲長在

邑有蓬萊鄉古史云金銀爲宮闕望之如雲

桃源客不迷風流未

寂寞遊屐半香泥

其三

御史平囚日平囚詩在郡樓下郎中渡母年今謂渡母橋豐碑推筆

妙二碑皆名書孤豕枕城偏汝南孝子墓焉白鶴空遶沈黃蒿尙蔓

延九原如可作執馭故忻然

其四

箔蠶迎豆熟俗有蠶豆江雪伴梅消抵虎螿經夏里語八月蝓蟬可抵

虎跳沙蛤趁潮里語有跳沙蛤酒豐雙印貴俗重雙魚酒藥肆萬金

饒謂馮樓也未覺西風遠三溪好採樵慈溪小溪藍溪也

其五

巷陌隨橋曲閭閻占水窮郡樓孤嶺對古謂嶺明嶺市港兩

潮通

開在城東隅

春暖雞鳴舉

在慈溪

秋寒鴨信風

江湖所呼

家家

人富足擊壤與吾同

其六

歲熟禾論黍

俗以二束爲一乘

人歸夜擊鐘金澄沙底水龍臥

井邊峯

金沙龍井皆在育王山

香火長存社

俗結金光明金剛社

漁鹽每奪

農年來練帛賤砧杵萬家春

其七

稻飯雪飜白魚羹金鬪黃鮪埼干蚌熟

在奉化

花嶼一村

香

在慈溪

海近春蒸溼湖靈夜放光

廣德湖每現光彩

北窗休寄

做大隱卽吾鄉

大隱山乃場適先生所居之處

乾道八

夫

煙嶼樓校本

其八

禽孝傳居俗

禽孝化在奉化

風癡動浹旬靈鰻旱天雨

即龍井也聖

米歉年尊

凶年尊報爲聖米

江漲長如海冬溫恰似春雞豚追

伏臘行路亦情親

其九

佛磬雲中寺樵歌郭裏湖城居蔭楊柳野寇息荏蒲巫
語傳杯玳漁蓑入畫圖幽香花滿谷不趁雪霜枯

其十

蓮閣紅堪掣瀾池靜不流

池在府前

梯航紛絕徼冠蓋錯中

州

高麗比入貢多使者

草市朝朝合

四郭皆有市

沙城歲歲修

邦人謂郡城維

以沙故
易類

雨前茶更好半屬買船收

題福源院

舒 亶

地占靈龜背山橫小嶼頭一橋雲借路雙沼月分秋竹
影搖虛室松煙著曉樓殘鐘誰共聽空籟更颼颼

題尊教院

舒 亶

竹砌緣寒渚松蹊藉綠苔樓臺隔林見花木帶雲開溪
阜常流水峯青自隱雷月華幾萬頃誰棹酒船來

香山野步二首

舒 亶

龍護空堂鉢雲籠古殿燈經窗僧待月茶井客敲冰驚
鴈回峯影疎星亞塔層心清更無睡未羨杜郎能

老杜
宿贊

公房有燈影
照無睡之句

其二

空澗寒探月高齋客聚星霜分破窗白山巖隔簾青窺
水知僧定占雲識地靈時時驚鶴夢木葉下危亭

和遊棲真寺見寄

舒 亶

曾是談經一草堂千年金碧欲飛颺頂峯有路青天近
絕壑無塵赤日涼月底露驚猿鶴夢雲中風動薜蘿香
芝筴茶竈平生念遙謝仙人白羽觴

和西湖卽席二首

舒 亶

金碧樓臺閣暮煙彩虹雙影臥漪漣雲鋪物外無塵地

月滿人間不夜天
細柳千門維畫舸
華燈兩岸度鳴絃
清狂亦有黃冠客
不負仙人載酒船

其二

十洲風籟韻笙簫
疑有仙人燕碧桃
影逼銀河星半墮
氣吞月窟兔爭豪
九秋波浪沙鷗狎
萬古功名釣艇高
卻恨何須明似鏡
空令志士泣霜毛

雨中遊杖錫

舒 亶

何人杖錫過千峯
雨裏風煙轉不窮
暗壑水聲清泱泱
深巖花氣溼濛濛
遙知雪嶺開亭近
舊說雲鄉有路通
自恨青鞋踏城郭
仙遊長在夢魂中

遊雲湖過香山偶成二首

舒 亶

去路騫騰逼紫霄，何年鳧舄墮王喬。
暗峯藏雨皆龍窟，靈草含霜半藥苗。
已覺山衣雲撲撲，還疑風鬢雪蕭蕭。
捫蘿更上岩巖頂，下視滄溟百水朝。

其二

塵境回頭隔聖凡，參差疊嶂巧如鑿。
歸雲墮碧粘僧屐，落葉飄紅上客衫。
果熟遙看猿渡澗，風號定想虎離巖。
長天自有無窮景，未信西岡日半銜。

和劉誼翁留題惠安二首

舒 亶

塢雲過雨翠成堆，天淡平湖一鑑開。
萬木號風韻絲竹，

千峯帶月上池臺靜無俗駕金鋪地閒有高人玉滿盃
聞道碧桃看欲發劉郎何事不歸來

其二

十里松行翠插天暗溪嫩草半芊絳笙歌自滿蕭郎宅
琴鶴空隨賀老船未分舊遊雲寂寞遙知歸夢蝶聯翩
故山幸好宜回首還見人閒換一年

和新開西湖十洲什

舒 亶

洗出煙華紫翠勻再將絕景付重闌千山有影螺垂地
一水無塵鏡照人香濺釣筒萍雨夜綠搖花塢柳風春
杖藜盡日滄浪興時有幽人岸白綸

秋燕十洲閣

舒 亶

綠玉手持尋五嶽正應未識海邊洲倚欄花木參差見
對岸笙歌次第遊煙霽多疑九峯曉波平全勝六鼉浮
仙風坐隔紅塵路消得丹青說此州

和樓試可遊育王

舒 亶

參天松柏綠陰陰古佛巖前一路深猿鳥不驚如有舊
雲山相對自無心數泓寒水雲藏雨十里輕沙地布金
杖屨更知非世境上方日日海潮音

題鄞江

舒 亶

地吞越絕海分深渺渺平流萬馬駿早晚渡舩潮有信

往來鷗鳥客無心
寒空倒影千山動
暖日澄波萬籟沈
安用魚龍閒養鬣
平時春雨自成霖

題西山雙乳泉

舒 亶

石眼雙開白欲漫
潺湲更傍碧琅玕
地饒爽氣全無滓
天借靈源兩不乾
曉月自分雲外潤
午茶誰鬪雪中寒
孝先多睡相如渴
試把清甘乞取看

題靈鰲廟三首

舒 亶

繞壇想會隨白馬

父老云此龍爲護楡神

蟠泥故復傍金沙
旱天

霹靂長平地樂歲
汗邪每滿車受賜
由來千里境論封
消得萬人家朱門
便是金塗榜未負
風雲在一涯

其二

絕境朱丹新棟宇深山靈響雜虺蛇黃金地底應千歲

古記云金甘雨人間幾萬家西域不勞方士呪西域方士能呪

千歲有龍者臨川禹步吹氣龍南州重識使君車後漢百里嵩爲

即浮出見抱朴子隨州刺史行部

其三

亘古人間蒙潤澤數泓雲底貯清冷功將名並山無泐

道與人尊地轉靈曉殿千家供香火旱天萬里入風霆

誰知別有醍醐味行路憧憧半未醒

題香山湯禪師

舒亶

千古神僧舊石扃清風如在地還靈溪形偃月無窮碧
山氣常雲不改青果熟猿猱時嘯聚錫飛巖穴尙芳馨
西來祖意誰人問老柏森森翠滿庭

題蒙堂

舒 亶

由來去住不相關贏得隨緣到處閒笑出海雲飛一錫
行分江月過千山微言定許誰人叩勝事偏於俗士慳
咫尺蒙堂隔霄壤城東搔首只空還

題翠巖丈室

舒 亶

別移寶所出埃塵無限金光欲照人斤斧不驚龍象伏
棟梁特地水雲新千峯坐斷人間路一榻分來月裏身

更著須彌師子座未饒摩詰妙通神

題明月堂

舒 亶

郢匠由來巧運斤清光那復隔纖塵九秋萬里雲頭路
半夜千峯頂上人坐見乾坤入肝膽陡驚草木亦精神
應憐赤水尋珠客白日茫茫尙問津

題五峯兼簡英禪師

舒 亶

何人縮地海東偏靈嶽分來不計年幾見彩雲爭照日
直疑仙掌欲擎天依稀故國松千尺迤邐前山石一拳
四面開軒看不足老僧時立碧溪前

題天童

舒 亶

日日青鞋踏白沙未應泛艇卽靈槎
雨溪清越鳴哀玉
風蔓蜿蜒動暗蛇
曉潤芝羞挑秀苗
午香茶竈煮蒼芽
玲瓏仙客知何在
千古煙霞自一家

題布袋和尚

舒 亶

休話人閒我獨尊
何妨塵肆且隨羣
乞錢往往多空手
問路時時向日雲
壁上形容圖尚在
囊中氣味許誰分
分明提起無人問
欲會應須眼裏聞

題靈橋門

舒 亶

危樓清迥立江風
紫邏紅旗落日中
暑雨澗溪來浩蕩
萍煙洲渚隔朦朧
懽聲不厭重城近
霽色遙知秀野豐

滄海一時傳麗句，天才真是杜陵翁。

蘇文饒往昌國意頗憚之，送以詩因勉之。

陳瓘

已聞舟楫具，那得苦曹君。雨過霜風急，帆飛雪浪分。長途方策足，暇日正論文。功業它年事，風波豈足云。

送周初平

陳瓘

齋鹽雖不飽，心與古人期。口體非吾養，紛華任爾爲。經明逢地芥，穎脫看囊錐。兩驥皆宛種，天衢好並馳。

次韻袁朝請陪太守遊湖心寺 陳瓘

塵境紛紛俗累增，故尋幽境訪南能。湖波浩渺無窮綠，

寺屋高低不計層詩老新吟工惱客使君餘暇得陪僧
棋中得失何時了一局輸贏未可撓

子同彥老自四明之永嘉中道畱宿岳林會法
照海印二禪伯夜話投曉登車乃行畱題於寺

三首

盧天驥

病骨倦鞍馬禪居忻少畱暮雲山盡路孤磬月明樓林
靜鉤騎曉風香罷亞秋重來坐磐石相對話歸休

其二

歎息老禪伯蕭閒心自如買松栽別塢引水過新渠草
色經行外禽聲宴坐餘自慚雙客鬢垂老尙征車

其二

報國竟無補敢辭山路遙
晚寒生竹徑新漲斷溪橋
奔走眞逋客安閑媿老樵
令人欲心折風雨夜瀟瀟

途中書懷寄奉化知縣二首

盧天驥

自戴淵明漉酒巾食鮭甘
作庾郎貧雖無殘菊簪華髮
賴有青山似故人幾處鷓鴣鳴
牛背雨經年衣犯馬蹄塵
待攜神武朝衫去還我煙溪漱石身

其二

尋馳漸覺歲崢嶸負郭蕪田未退耕
正恐山溪吹岸去任從煙草喚愁生
別來竹院門長掩好去漁舟手自撐

漸晚歸心在何許夕陽低處伴雲橫

絕句

太上皇帝御製題扇面所畫紅木犀賜從臣榮

蕤

月宮移向日宮栽染得嬌紅入面來多謝秋風揚雨露
丹心一一爲君開

送竇公持鄞江尉

范仲淹

片帆飛去若輕鴻一霎春潮過浙東王謝江山久蕭索
子真今爲起清風

送丁司理赴明州

范仲淹

仙家枝葉令威孫南去司刑庇越民金闕道書微旨在
獄多陰德是真人

道書謂升真者皆須會爲獄官

送港公歸四明講席

范仲淹

滿面南風指四明山長水曲不勝情自言此去雲林下
惟講華嚴報太平

詠西湖十洲

劉 珵

花嶼

淺深豔冶一枝枝帶露臨風不自持水上紅雲真縹渺
多才卻憶退之詩

芳草洲

春水池塘空苒苒長安古道倍依依爭如綠向芳洲遍
不怨王孫去未歸

柳汀

江渡隨堤千萬縷年年折盡最長條誰知煙雨汀洲晚
閑舞東風拂畫橋

竹嶼

翠雲搖曳波心起清影扶疎月際來結實終期丹鳳至
虛心聊映小桃開

煙嶼

閑伴晚雲籠淺瀨半和秋雨羃寒沙溶溶洩洩拖輕素

遮盡漁簑與釣槎

芙蓉洲

翠幄臨流結絳囊多情長伴菊花芳
誰憐冷落清秋後能把柔姿獨拒霜

菊花洲

金蕊含香冒雨開清無俗格絕塵埃
休嗟不及東籬下也有幽人載酒來

月島

衆樂亭前月滿洲雨餘風靜正中秋
桂華冷射千尋碧十頃湖光爛不收

雪汀

六出花輕巧翦裁瑤林玉砌映高臺冰漸四面寒光合
疑有飛仙月下來

松島

恥隨楊柳嬌春色厭近芙蓉透暗香直幹凌霜終偃蹇
願爲一柱壯明堂

太守劉戶部乘水涸時濬治墮塞因其餘力補
葺廢墜而湖上之景爲之一新島嶼凡九作一
成十隨景命名遂有十洲之詠邀余同賦爲之

次韻

王 亘

花嶼 其一

傳聞春入水邊枝
懊惱行人不暇持
任是杜陵歸較晚
也須排悶強裁詩

芳草洲 其二

十步中間水四圍
不容紅紫亂相依
春風管取青青在
莫問愁人歸未歸

柳汀 其三

不似長安陌上梢
只將離恨寄長條
臨流繫得紅兒住
畱作憧憧兩岸橋

竹嶼 其四

鳳巢龍驤未是才獨驚高節出雲來此君端的吾家舊
爭得柴門相向開

煙嶼 其五

離朱諦視也昏花一疋青縑蓋白沙咫尺漁舟看不見
凡夫何處覓仙槎

芙蓉洲 其六

須信金行有智囊會將秋色賽春芳清宵見白休相拒
多是潘郎鬢上霜

菊花洲 其七

年年重九爲人開不染春風一點埃湖上蕭騷如栗里

虛樽還待白衣來

月島 其八

夕陽盡處見滄洲一片清光水國秋應是玉眞梳洗罷
菱花臺上不曾收

雪汀 其九

玉落風刀細細裁梁王宮裏舊池臺
梁有雪宮逍遙此地何
人可除是冰膚駕鶴來

松島 其十

誰陪老碧到秋霜賴有黃花隔水香
土淺波深難獨立
可能移植向公堂

附和韻詩十首

舒 賈

花嶼

暖吹紅紫上青枝
掠水風煙巧自持
蜂蝶鷓鴣各芳意
錦囊消得探春詩

芳草洲

小雨如酥露乍晞
嶼花汀柳自相依
畫橋不礙尋春屐
誰仿煙波拾翠歸

柳汀

困倚滄波綠動搖
冷煙疎雨共蕭條
誰將輕薄嬌春態
強拂人頭向市橋

竹嶼

欲問葛陂安在哉
端疑波底化龍來
子猷此興君知否
小徑何妨卷竹開

煙嶼

著漠寒蘆不見花
暗藏鷗鷺啄晴沙
暖風吹起渾無定
半落僧窗半落槎

芙蓉洲

照水枝枝蜀錦囊
年年澤國爲誰芳
朱顏自得西風意
不管清秋昨夜霜

菊花洲

懶對陶家酒甕開東籬寂寞久風埃會須結取登高客
折上龍山醉帽來

月島

何人騎鶴上瀛洲清影明波正九秋吹罷玉笙端不見
滿空桂子有誰收

雪汀

點柳妝梅不暇裁平波直擬涌瑤臺釣磯葦岸知何許
幾誤漁舟夜半來

松島

亭亭古幹對滄浪雨洗風飄老吹香晚歲何人同寂寞

水西我有讀書堂

附和韻詩十首

陳瓘

花嶼

紅紫商量欲滿枝探春觴豆好攜持便須載酒凌波去
底事黃堂獨賦詩

芳草洲

綠色映波千古恨至今南浦兩依依我今又出江東去
多少行人宦未歸

柳汀

密幹參差籠月影輕波蕩漾蘸煙條暑天要此清涼地

欲往何辭度小橋

竹嶼

霜姿迥出紅塵外
只有鷓鴣傍水來
別岸若尋栖隱處
軒窗須爲此君開

煙嶼

靄靄紛紛綠底事
故來波上罩層沙
莫教散入滄溟去
卻恐能迷上漢槎

芙蓉洲

紅雲可覓無蜂去
渺渺寒波映晚芳
未必孤根能耐雪
且看秋豔已經霜

菊花洲

光景不畱人易老恨無羽翼出塵埃世閒那有飛昇藥
且傍汀洲採菊來

月島

月明偏照海邊洲綠水迴環漾素秋斗轉參橫羣動息
桂花零落遣誰收

雪汀

誰把平甌水上閒坐看飛絮撲瓊臺酒豪耳熱笙歌沸
應怪幽人此地來

松島

影參岸柏童童綠葉蔽汀蘭澹澹香斤斧不來人迹遠
養成千尺勢堂堂

戲贈育王虛白長老

王安石

白雲山頂病禪師昔日公卿各贈詩行盡四方年八十
卻歸荒寺有誰知

觀明州圖

王安石

明州城郭畫中傳尙記西亭一艤船投老心情非復昔
當時山水故依然

天童山溪上

王安石

溪水清漣樹老蒼行穿溪樹踏春陽溪深深樹密無人處

唯有幽花渡水香

鄞縣西亭

王安石

收功無路去無田
竊食窮城度兩年
更作世間兒女態
亂栽花竹養風煙

寄育王大覺禪師

王安石

山木悲鳴水怒流
百蟲專夜思高秋
道人方丈應無夢
想復長吟擬慧休

別鄞女墓

王安石

年登三十已衰翁
滿眼離傷祇自攻
今泛小舟來訣汝
此生蹤跡各西東

遊翠巖山

舒 亶

桃源深處一招提門對寒雲路遶溪長使千峯光景動
未應洞裏老金雞

遊大梅護聖四首

舒 亶

萬壑聲中柏子煙高僧日日看雲眠當年象虎今何在
千古寒堂一鐵鞭

其二

仙去人間地轉靈蛟龍合處谷風生誰知雲霧千峯頂
長作青天霹靂聲

其三

流水山閒無盡時登臨到處與心期世人只愛桃源好
梅熟山閒怎得知

其四

雞犬同時亦上昇赤雲今日幾人行我來正唱昇平曲
不用山閒變姓名

遊灌頂三首

舒 亶

十里曾聞一嘯聲當年猿鶴想猶驚白雲不礙青天路
贏得重來擺手行

其二

萬松偃蹇插雲根四面諸峯盡子孫日日飛煙雲霧斂

不妨掌上看乾坤

其三

雪頂胡僧眼歲天只應風月是生緣
那知坐作人間雨
千丈巖頭一道泉

歸郡書金峨二首

舒 亶

叱咤滄溟雪浪空鯨鯢騎去杳亡蹤
煉丹井畔春蕭索
知在蓬萊第幾重

其二

又入西湖醉過春嶺頭猿鶴幾時閒
無端雨意隨人去
直恐衣巾盡是雲

含珠林

舒 亶

萬箇松杉一顆珠老僧心手最工夫冷光長在千峯頂
誰道人間夜月孤

題天王院內鑑堂

舒 亶

等是人間出世人數他珍寶信非珍茫茫白日誰回首
此處元無一點塵

題福勝院

舒 亶

蒼巖赤壁聳崎嶇長者何年爲布金卻憶樵風生乳竇
萬松回合兩龍吟

湖心寺偶書

舒 亶

吹落清香縹緲風樓臺
髣髴水邊紅人間誰是丹青手
畫取春湖細雨中

題寶林院瓊閣黎房

舒 亶

山農未用踏溝車一穴靈泉蔭萬家
香積從今飽檀施
會看講夜落天花

題法喜院是院一瓦一木皆自能師手而師丈
室惟布衾木枕無復長物卽之坐龐眉皓頂泊
然似不能言者無乃真有道者耶

舒 亶

抱山重屋兩迴廊杉檜如雲百尺長
香火七年誰第一

老師辛苦頂如霜

其二

了無情解作攀緣一鉢三衣只兀然坐對青山不知老
學人休問祖師禪

太白峯

舒 亶

千峯下視盡兒孫僊事寥寥不可聞長作人間三月雨
請看膚寸嶺頭雲

峯頂常有雲
氣祈雨輒應

太白菴

舒 亶

何年杖錫此徘徊天上眞官爲我來芝圃鶴歸香火冷
石基空鎖舊莓苔

玲瓏巖

舒 亶

詭形迴與萬山殊，空洞由來一物無。
直恐虛心自天意，人間穿鑿枉工夫。

響石

舒 亶

淵明休弄沒絃琴，混沌中含太古音。
聞說幾回風雨夜，四山渾作老龍吟。

龍池

舒 亶

靈蹤聊寄數峯雲，雨意含雲白晝昏。
不用高僧時呪鉢，一泓長貯萬家村。

虎跑泉

舒 亶

一嘯風從空谷生直教平地作滄溟靈山不與江心比
誰會茶仙補水經

佛跡

舒 亶

蒼崖絕壁印苔痕陳跡千年尚似新杖履紛紛走南北
幾人不是刻舟人

臨雲閣

舒 亶

高僧終日笑凭欄亦似無心懶出山幾度海風吹散雨
坐看彩翠落人間

春樂軒

舒 亶

隔水巖花紅淺深花邊相對語幽禽管絃不到山間耳

誰會凭欄此日心

宿鷺亭

舒 亶

雲過千溪月上時
雪蘆霜葦冷相依
正綠野性如僧癖
肯爲游魚下釣磯

文饒自昌國以詩見寄次韻二首

陳 瓘

百川滾滾到來休
此是人間第一流
鯨鬣爲君翻駭浪
蘭茗空自滿汀洲

其二

海邦渺渺知何在
風入高帆頃刻過
何似一樽湖上酒

月明安穩照寒波

文饒自京師還欲往昌國而風作不可渡乃爲絕句戲之

陳瓘

欲衝高浪卻沈吟酒近瀛洲懶得斟莫道顛風無好意爲君吹過遠歸心

長短句

幕山溪周銖作也銖字初平擢進士第調開封中牟簿未幾掛冠而歸恬不以仕進爲意至松江作此詞以見志陳了翁亦以阮郎歸詞贈之松陵江上極目煙波渺天際接滄溟到如今東流未了

吳檣越櫓都是利名人空擾擾知多少只見朱顏老故
園應是綠遍池塘草家住十洲西算隨分生涯自好漁
簑清貴休羨謝三郎紅蕖月白蘋風何似長安道

阮郎歸

陳瓘

從來多唱杜鵑辭如今真箇歸健帆笑裏落湖西回看
江浪飛說情話復何疑臨流應賦詩引觴自酌更何之
心閑光景遲

新按

賦九經堂賦

豈無制而然

劉本及盧延祐
然下有哉字

詩舒實和四明雜詩三注

汝南孝子墓焉

盧延祐墓
下有在字

乾道八

兪

煙嶼樓校本

四明圖經卷八

鄞 徐時棟校刊